

Morning Dogri (NSD) National News Bulletin 19-04-2024

आकाशवाणी

खबरां पूनम डोगरा कोला।

1. लोकसभा चुनां दे पैहले गेड़ लेई मतदान शुरू होई गोआ ऐ।
2. राष्ट्रपति द्रौपदी मुर्मू ते प्रधानमंत्री नरेन्द्र मोदी होरें लोकें गी बधी-चढ़ियै वोट पाने दी अपील कीती ऐ।
3. नौसेना उप-प्रमुख वाइस एडमिरल दिनेश त्रिपाठी होरें गी नौसेना दा नमां प्रमुख नियुक्त कीता गोआ ऐ।
4. कैन्या दे सेना प्रमुख जनरल फांसीस ओगोला हुंदी देश दे पच्छमी हिस्से च इक हैलीकाप्टर हादसे च मौत होई गई।
5. आईपीएल क्रिकेट च जंदी रातीं चंडीगढ़ च मुंबई इंडियन्स नै पंजाब किंग्स गी 9 रंजें कन्नै हराई दित्ता।

<><><><><><>

Vote

लोकसभा चुनां दे पैहले गेड़ लेई मतदान शुरू होई गोआ ऐ। इस गेड़ च 17 राज्यें ते 4 केन्द्र शासत प्रदेशें दे 102 सीटें लेई वोट पाए जा'रदे न। पैहले गेड़ च उत्तर प्रदेश दे 8, पच्छिम बंगाल दे 2, असम दे 5, मध्यप्रदेश दे 6, महाराष्ट्र दे 5, राजस्थान दे 12, तमिलनाडू दे सब्बै 39, उत्तराखंड दे सब्बै 5, छत्तीसगढ़ दी 1 ते मणिपुर ते मेघालय दी 2-2 सीटें लेई वोट पाआए जांगन। अरुणाचल प्रदेश ते सिक्किम विधानसभा चुनाएं लेई बी अज्ज वोट पोआए जा'रदे न। अज्ज होआ'रदे चुनाएं च 1 ज्हार 625 मेदवार चुनां मैदान च न। इस दरान सुरक्षा दे निग्गर बंदोबस्त कीते गेदे न। भारती जनता पार्टी दे वरिष्ठ नेता ते केन्द्री मंत्री नितिन गडकरी, सर्वानंद सोनोवाल, किरण रिजिजू, डॉ. जितेन्द्र सिंह, संजीव बालियान ते कन्नै गै बीजेपी नेता तमिलसाई सुंदराजन ते जितिन प्रसाद ते कांग्रेस दे नेता गौरव गोगाई, कार्ति चिंदबरम ते नकुल नाथ, डीएमके नेता दयानिधि मारन प्रमुख चेहरे न, जिंदी किस्मत दा फैसला अज्ज ईवीएम च बंद होई जाग। इस गेड़ च 16 करोड़ 63 लख मतदाताएं लेई कुल 63 ज्हार मतदान केन्द्र बनाए गेदे न। कुल मतदाताएं च 8 करोड़ 40

लकख मर्द ते 8 करोड़ 23 लकख महिला ते 11 जहार शा मते ट्रांसजेंडर मतदाता शामिल न। तकरीबन 36 लकख मतदाता पैहली बारी मतदान करगंन। इस गेड़ च 14 लकख 85 जहार शा मते मतदाताएं ते तकरीबन 14 लकख दिव्यांग मतदाताएं गी घर थमां वोट पाने दी सुविधा दित्ती गई ऐ। चुनां आयोग नै इस गल्ला गी जकीनी बनाने लेई गलाया ऐ जे पीने आले पानी दी सुविधा, व्हील चेयर, बिजली ते होर दुइए सुविधाएं गी मतदान केन्द्रें च उपलब्ध कराया जा तां जे कुसा गी कुसा किस्म दी परेशानी कन्नै रू-ब-रू नैई होना पवै।

<><><><><><>

Lok Sabha Election

लोकसभा चुनाएं दे पैहले गेड़ तैहत अज्ज उधमपुर संसदी हल्के च वोट पाए जा'रदे न। इस हल्के तैहत कुल 16 लकख 23 जहार योग्य मतदाता न जिंदे च 8 लकख 45 जहार मर्द ते 7 लकख 77 जहार महिला मतदाता न। इनें मतदाताएं च 23 जहार 637 दिव्यांग मतदाता न ते 403 मतदाता नेह च जिंदी उमर 100 ब'रें शा बद्ध ऐ। इस हल्के तैहत कुल 5 जिले औंदे न जिंदे च कटुआ, उधमपुर, किशतवाड़, डोडा ते रामबन शामिल न। इस हल्के लेई 2 जहार 637 मतदान केन्द्र, बनाए गेदे न ते 4 जहार शा मते कर्मिएं गी चुनावी ड्यूटी लेई तैनात कीता गेदा ऐ। मतदान अज्ज बडलै 7 बजे शा शुरू होई गेदा ऐ ते एह संजा 6 बजे तगर चलोग। सरबंधत बीएलओ आस्सेआ संचालित इक बाद्धू वोटर हैल्पडैस्क बी होग जेहड़ा लोड़मंदें गी जरूरी मदाद उपलब्ध करोआग। मतदाता फोटू शिनाख्ती कार्ड दे अलावा होर 12 किस्मै दे दस्तावेज अपनी शिनाख्त लेई मतदान गित्तै लेइयै जाई सकदे न। इंदे च आधार कार्ड, एमजी-नरेगा जॉब कार्ड, बैंक ते डाकखाने दी पासबुक, श्रम मंत्रालय आस्सेआ जारी सेहत बीमा स्मार्ट कार्ड, ड्राइविंग लसैंस, पैन कार्ड, एनपीआर तैहत आरजीआई पास्सेआ जारी स्मार्ट कार्ड, पासपोर्ट, फोटू लग्गे दा पेंशन दस्तावेज, फोटू लग्गे दा सेवा शिनाख्ती कार्ड, सरकारी शिनाख्ती कार्ड ते दिव्यांगता शिनाख्ती कार्ड बगैरा शामिल न।

<><><><><><>

Security Review

कश्मीर घाटी च लोकसभा चुनां पूरी चाल्ली सुरक्षत ते रमानदारी आले ढंगै सिर करोआना जकीनी बनाने लेई कल लग्गी दी वरिष्ठ सुरक्षा अधिकारिएं दी इक जायजा बैठक च सुरक्षा बंदोबस्त होर निगगर बनाने ते आतंकवाद रोधी कारवाई लेई पूरी तैआरी रखने दा फैसला

लैता गेआ। आईजीपी कश्मीर जोन बी.के.बिरदी हुंदी अध्यक्षता च लगी दी इस बैठक च कश्मीर घाटी च चुनां प्रक्रिया गी पूरी चाल्ली रमानदारी, सुरक्षत ते बवस्था आले ढंगै सिर तोड़ चाढ़ने बारे इक रणनीति तैआर कीती गई। जेह्दे च बक्ख-बक्ख सुरक्षा अर्जेसिएं बश्कार नेड़मा तालमेल ते सैहयोग बनाने दा धेइया कीता गेआ।

<><><><><><>

President-Vice President

राष्ट्रपति द्रौपदी मुर्मू ते उपराष्ट्रपति जगदीप धनखड़ होरें लोकें गी अपील कीती ऐ जे ओह बधी-चढ़ियै मतदान प्रक्रिया च हिस्सा लैन।

<><><><><><>

PM-Vote

प्रधानमंत्री नरेन्द्र मोदी होरें अज्ज थमां शुरू होआ'रदे लोकसभा चुनां च रिकार्ड गिनतरी च वोट पाने दे अपने अधिकार दा इस्तेमाल करने दा आग्रह कीता ऐ। इक सोशल मीडिया पोस्ट च मोदी होरें युवा ते पैहली बारी वोट पाने आले मतदाताएं गी बधी चढ़ियै मतदान करने दा आह्वान कीता ऐ। उनें गलाया जे खासकर हर वोट मायने रखदा ऐ ते हर अवाज मायने रखदी ऐ।

<><><><><><>

Srinagar Nomination

श्रीनगर संसदीय हल्के दे रिटर्निंग अफसर होरें इस हल्के लेई कल लोकसभा चुनां दी अधिसूचना जारी करी दित्ती। इस हल्के च गांदरबल, श्रीनगर, पुलवामा, बडगाम ते शोपियां जिले दे 18 असैंबली हल्कें औं दे न। चुनां लड़ने दे ख्वाहिशमंद मेदवार 25 अप्रैल 2024 तगर कम्मकाज आले कुसै बी ध्याड़े 11 बजे शा लेइयै दपैहरी मगरा 3 बजे तगर अपना नामांकन दाखल करी सकगंन। मेदवारें दे नामजदगी आले कागज पत्रें दी जांच 26 अप्रैल गी कीती जाग। मेदवार 29 अप्रैल दपैहरी मगरा 3 बजे तगर अपनी नामजदगी वापस लेई सकदे न। श्रीनगर संसदी हल्के लेई मतदान 13 मई गी बडलै 7 बजे शा संजा 6 बजे तगर करोआया जाग।

<><><><><><>

Navy Chief

नौसेना उप प्रमुख वाइस एडमिरल दिनेश त्रिपाठी होरें गी भारतीय नौसेना दा नमां प्रमुख नियुक्त कीता गेआ ऐ। ओह एडमिरल आर.हरि कुमार हुंदी थाहर लेंगन। कुमार होर इस म्हीने दी 30 तरीक गी पेंशनरी होआ'रदे न। नौसेना स्टाफ दे उप-प्रमुख दे तौर पर औहदा संभालने थमां पैहले एडमिरल त्रिपाठी होरें पच्छमी नौसेना कमान च फ्लैग आफिसर कमांडिंग-इन-चीफ दे तौर पर कम्म कीता ऐ। संचार ते इलैक्ट्रानिक युद्ध माहिर एडमिरल त्रिपाठी नौसेना दे फ्रंटलाइन युद्धपोते पर सिग्नल संचाल अधिकारी ते इलैक्ट्रानिक युद्ध अधिकारी दे तौर पर कम्म करी चुके दे न। वाइस एडमिरल दिनेश त्रिपाठी होरें गी अति विशिष्ट सेवा सम्मान ते नौसेना सम्मान कन्नै सम्मानित कीता गेआ ऐ।

<><><><><><>

Kenya

कैन्या दे सेना प्रमुख फ्रांसिस ओगोला हुंदी देशे दे पच्छमी हिस्से च इक हैलाकाप्टर हादसे च मौत होई गई ऐ। उंदे कन्नै 9 होर सैन्य कर्मिं दी मौत होई गई ऐ। कैन्या दे राष्ट्रपति विलियम रूटो होरें टैलीविजन पर एह घोषणा कीती। विलियम रूटो होरें दस्सेआ जे हैलाकाप्टर डोआरी भरने दे तुरत मगरा हादसे दा शकार होई गेआ। रूटो होरें दस्सेआ जे जनरल ओगोला मुख्ख दे उत्तरी रिफ्ट क्षेत्र च सैन्य शिविर दा दौरा करने ते स्कूल दे कम्मै दा निरीक्षण करन जा'रदे हे।

<><><><><><>

IPL

आईपीएल क्रिकेट च कल रातीं चंडीगढ़ च मुंबई इंडियन्स नै पंजाब किंग्स गी 9 रंजें कन्नै हराई दित्ता। पैहले बल्लेबाजी करदे होई मुंबई इंडियन्स नै 20 ओवरें च 7 विकेटें दे नुकसान च 192 रंज बनाए। 193 रंजें दे लक्ष्य दा पिच्छा करदे होई पंजाब किंग्स नै 19 ओवरें ते इक गेंद पर 183 रंज पर गै आउट होई गई। पंजाब किंग्स आस्तै आशुतोष शर्मा नै 28 गेंदें च 61 रंज बनाए ते हर्षल पटेल नै त्रै विकेट लैते। मुंबई इंडियन्स दी तरफा सूर्य कुमार यादव नै 53 गेंदें च 78 रंज बनाए ते जसप्रीत बुमराह ते गेराल्ड कोएत्जी नै 3-3 विकेट लैते।

लखनऊ दे एकाना क्रिकेट स्टेडियम च लखनऊ सुपर जायंटस च मकाबला चिन्नेई सुपर किंग्स कन्नै होग। मैच संजा साढे 7 बजे शुरू होग।

<><><><><><>

DRDO

रक्षा अनुसंधान ते विकास संगठन नै अज्ज सवदेशी तकनीक आली क्रूस मिसाइल दा सफल डोआरी परीक्षण करी लेआ ऐ। मिसाइल गी ओडिशा दे तटीय चंदीपुर दे इनग्रेटिड टैस्ट रेंज थमां दागेआ गेआ। रक्षा मंत्रालय मताबक मिसाइल दी डोआरी दी भारतीय हवाई फौज दे एसयू-30-एमके-आई थमां तक्क रखी गई। मिसाइल गी अज्जे-कल्लै दी तकनीक दे उपकरण ते साफ्टवेयर कन्नै लैस ऐ जिस राएं उंदी कार्य-क्षमता मती बेहतर होग। रक्षा मंत्री राजनाथ सिंह होर डीआरडीओ गी मिसाइल दे सफल डोआरी परीक्षण लेई ममारखां दित्तियां न। उनें आक्खेआ जे एह इक मुख्य मील दा पत्थर ऐ। डीआरडीओ दे अध्यक्ष डॉ. समीर.वी. कामत होरें डीआरडीओ दी टीम गी इस सफलता लेई ममारखां दित्तियां न।

<><><><><><>